

fes que uos tomaron ende treze meses et que me pidiedes merced que mandasse y aquello que por bien touiesse. A esto vos respondo que esta mingua que uos lo acrecere adelante depues de los seys annos passados, et assi uos lo mandare complir aquel tiempo. Dada en Xerez, el rey la
 5 mando domingo xxii dias de abril, era de mill et ccc et seys annos. Yo Pedro Gonçalez, escriuano de Garcia Dominguez, notario del rey en la Andaluzia, la fiz escreuir.

XXXVII

Alfonso X a los partidores de Murcia. Ordenádoles que hicieran la partición del campo de Cartagena. Jerez, 22 de abril de 1268. (Archivo Municipal de Murcia, Privilegios originales n.º 22).

Don Alffonso, por la gracia de Dios, rey de Castiella, de Toledo de Leon, de Gallizia, de Seuilla, de Cordoua, de Murcia, de Jahen et del Algarue. A uos, Garcia Martinez, dean de Cartagena, mio clerigo, et a uos
 10 Orrigo Porcel, et a uos Domingo Perez, repostero mayor de la Reyna et a uos, Beltran de Villanueua, mio escriuano, mios partidores de Murcia, salud et gracia. Sepades que el conceio de Murcia me enbiaron pedir merced en razon de la partición del campo de Cartagena, que ge la man-
 15 dasse partir, et yo tengolo por bien. Onde, uos mando que uos que uayades et que lo partades desta guisa: que dedes a los caualleros et a los omnes buenos sennalados, quatro yugadas de heredad a anno et uez, et que ge lo dedes a cada uno en aquellos arrahales que uos les assignastes agora en la particion et punnad en lo fazer bien, porque yo entienda
 20 que auedes sabor de me seruir en ello. Et a los otros uezinos que les dedes comunalmente a cada uno segund que merecieren. Et non fagades end al. Dada en Xerez, el rey la mando, domingo xxii dias de abril, era de mill et ccc et seys annos. Yo Pedro Gonçalez, escriuano de Garcia Dominguez, notario del rey en la Andaluzia, la fiz escreuir.

